

Տ. ՆՈՐՎԱՆ ԵՊԻՍԿՈՊՈՍ ԶԱԲԱՐՅԱՆ

Տ. Նորվան եպիսկոպոս Զաքարյանը (ավագանի անունով՝ Արմեն) ծնվել է 1940 թվականին Բելյուդում (Լիբանան)։

Նախնական կրթությունը ստացել է տեղի Նոր Ադանա թաղի հայ ազգային Աբգարյան վարժարանում։

1953—1954 ուսումնական տարում սովորել է Անթիլիասի Դպրեվանքում, իսկ 1958 թվականին՝ Հ. Բ. Ը. Միության Բելյուդի Հովակիմյան-Մանուկյան երկրորդական վարժարանում։

1959 թվականին ընդունվել է Երուսաղեմի Ժառանգավորաց վարժարանի ընծալարանի բաժինը։


1967 թվականի դեկտեմբերի 24-ին Փարիզի Ս. Հովհաննես Մկրտիչ Մայր եկեղեցում ձեռնադրվել է սարկավագ՝ ձեռամբ Արևմտյան Եվրոպայի հայրապետական պատվիրակ և Ֆրանսիայի հայոց առաջնորդ Տ. Սերովբե արքեպ. Մանուկյանի։

1968 թվականի հոկտեմբերի 28-ին, Գյուտ խաչի տոնին, Փարիզի Ս. Հովհաննես Մկրտիչ Մայր եկեղեցում ձեռնադրվել է կուսակրոն քահանա՝ ձեռամբ Տ. Սերովբե արքեպ. Մանուկյանի, և վերանվանվել Տ. Նորվան։

1968—1973 թթ. բարձրագույն կրթություն է ստացել Փարիզի կաթոլիկ ինստիտուտի աստվածաբանական ֆակուլտետում, որտեղ ուսումնառության տարիներին ներկայացրել է բազմաթիվ քննական աշխատանքներ՝ նվիրված հայ մատենագիրների կյանքին և գրական վաստակին, ինչպես օրինակ՝ Ստ. Սյունեցուն, Եղիշե պատմիչին, Զաքարիա Զագեցուն և այլն։

1970 թվականի փետրվարին մասնավոր վարդապետական իշխանություն է ստացել Փարիզի հայոց Ս. Հովհաննես Մկրտիչ Մայր եկեղեցում՝ ձեռամբ Տ. Սերովբե արքեպ. Մանուկյանի։

1973 թվականին Տ. Սերովբե արքեպ. Մանուկյանի կարգադրությամբ նշանակվել



է Իսի Լե Մուլիմոյի հայ եկեղեցու շինության հանձնախմբի նախագահ։

1975 թվականից, սույն եկեղեցու կառուցման ավարտումից հետո, մինչև 1980 թվականը վարել է Իսի Լե Մուլիմոյի և շրջակայքի հոգևոր հովվի պաշտոնը։

1980 թվականի մարտի 16-ին նշանակվել է Լիոնի և Ռոն Ալի շրջանի հայրապետական պատվիրակի փոխանորդ, պաշտոն, որը շարունակում է ձեռնհասորեն վարել մինչև օրս։

1982 թվականի փետրվարի 14-ին, կիրակի օրը, Տեառնընդառաջի տոնին, Ս. Էջմիածնի Մայր տաճարում ձեռնադրվել է եպիսկոպոս՝ ձեռամբ Ամենայն Հայոց Վեհափառ Հայրապետի։

